



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 3

Yangia anidakangma :



Tir Yimiyim



tiryimiyim@aolima



tir yimiyim

TAPAK 7

MNF vice president

Vanlalzawma-i mapa nungi anen

'BJP indang rong angumoka

idaki: Akhilesh Yadav



VOL. XVIII NO. 200 (ADOK 200) DIMAPUR

RASEMNÜ (WEDNESDAY)

MONUPII (MAY) 05, 2021

₹ 5.00

Dimapur nung SBI kongsangtem shibangtsür

Dimapur, May 4, 2021 (TYO): Covid-19 azüoktsü atema Dimapur district administration-i State Bank of India indang kongsang pezü tashi shibangtsü tetuyuba agütsüogo.

SBI Golaghat road, Rangapahar Branch aser Bazaar Branch ghonda 48 atema shibangtsür aser külen tanga

tetuyuba ka magütsü tashi SBI Main branch shibanger, ta Dimapur Deputy Commissioner aser DDMA chairman, Rajesh Soundararajan-i metetdaksü.

Iba tetuyuba alema inyakertem Disaster Management Act 2005 kübok merenshitsu, ta Rajesh Soundararajan-isa ashi.

Dimapur Airport nung passenger 449 dak COVID-19 putet

Dimapur, May 4, 2021 (TYO): Dimapur Airport nung April 17 nungi 29, 2021 tsüingda nisung 449 dak COVID-19 aliba putetogo.

Dimapur Airport nung bendenba sample 833 tendangba nungi nisung 449 dak COVID-19 aliba putet, ta Nagaland Health & Family Welfare department-i metetdaksü.

"Tongtipang nungdak balaka melira ainlen mesenzü tajungba aser negative test result angu nunga quarantine asütsüla. Ainlen senzusenbongertemi anogo tenetbosa quarantine asütsüla aser iba mapang pei temang nung shirangba yimya ali mali'ar reprangtsüla," ta Health & Family Welfare department-isa metetdaksüogo.

COVID-19 Nagaland: Nisung 266 dak putet

Dimapur, May 4, 2021 (TYO): Mongulbarnü Nagaland nung nisung 266 dak COVID-19 aliba putetogo aser parnok züingsema nisung ajak agi 14717 kümogo.

"Tanü nisung 266 dak COVID-19 aliba putet. Parnokji Dimapur nung 162, Kohima nung 71, Tuensang nung 11, Mon nung 8, Peren aser Mokokchung nung pezüzü (4),

Longleng nung 3 aser Kiphire, Phek o Zunheboto nung kaka (1) lir" ta ta Health & Family Welfare Minister, S Pangnyu Phom-i metetdaksü.

"Maneni, tanü shiranger 32 tashi taneptsü angu. Parnokji Dimapur nung 17, Phek nung 8, Tuensang nung 3 aser Kohima o Mokokchung nung anana (2) lir" ta paisa ashi.

Mokokchung DC ajanga metetdaksür

Mokokchung, Monupii/May 04 (TYO): Govt. of Nagaland, Department of Home (NSDMA) sangdong nung ajemdaker, Mokokchung district kübok kiyimba benjong dak alia lokti sentepba/sendenba tesem, tekülemdak ki densema ajak shibangtsü ozüing agütsür, ta Mokokchung Deputy Commissioner, Limawabang Jamiri May 4, 2021 nü sangoktsüogo.

Kiyimba benjong agütsü atemaji Deputy Commissioner dang nungi temelaba agütsüla aser iba nungji nisung 50 tashi dang melatsü. Iba tetuyuba nung tashi mangartem temzüngi melaba ama tapet temerenshi alitsü, ta Mokokchung DC-isa sangdong nung metetdaksü.

Maneni state nung COVID-19 ajanga tensa tia tamajungba küma aoba ajanga koda masüba maparen kar dak alaka Mokokchung Deputy Commissioner office-i public semdangsemrar aittsü tenoktangba yoker, ta Mokokchung DC, Limawabang Jamir-isa metetdaksüogo.

Shishilemar shingai kecha oset nunga District Level Price Monitoring Committee

(DLPMC) Mokokchung District nungi temelaba magi-i jenjang ajungkettsü/sakettsü khenyongi memelar, ta sangdong ajangasa ashi.

Iba teletetba ya May 4, 2021 nü District Level Price Monitoring Committee (DLPMC) pur Mokokchung Deputy Commissioner mendenbuba sür senden ka amenba mapang lemteta liasü.

DLPMC-i bazaar nung ajungben chiyungtsütem aser danga osettsüset jenjang meita aoba mapang chiyungtsütem aser danga osettem nunga jenjang saketa atuba kecha mungutet.

Shishilemar telok shingai osettsüset miima nangdena mayutsüla, aser DLPMC dang masüingdangi/temelaba magii bazaar nung osettsüset kecha nunga jenjang ajungkettsü memelar, ta Mokokchung DC-i tekümdangtsü ka metetdaksüogo.

Nüburtemi tim masüba mapa kar danga putetra iba helpline No-9436609959/7005850562 nung tongteprateptsü akok. Kija/telok kari danga iba tetuyuba anema inyakra, temzüngi melaba ama tapet temerenshi alitsü, ta Mokokchung DC-isa metetdaksü.

Dimapur nung Odd-Even aser Kohima nung night curfew tenzüker

Dimapur, May 4, 2021 (TYO): May 5, 2021 aonung 7:00 ako nungi tenzüker Dimapur kübok Containment Zone nung garitem atema ODD-EVEN system tenzüksü, ta Commissioner of Police, Rothihu Tetseo, IPS-i Mongulbarnü metetdaksüogo.

Iba inyakim ya asüing nungi tenzüka anogo tenet atema Dimapur Municipal Council, Chumukedima Town Council aser Dimapur-Chumukedima four lane road anasa aliba colonies/villages nung benshitsu, ta paisa ashi.

Odd number Day: Hombor, Bodbar aser Hokolbar anogotem registration odd number (1, 3, 5,

7 & 9) agi tembangba garitem dang senzütsü.

Even number Day: Mongulbar, Brihostibar aser Honibar anogotem registration even number (2, 4, 6, 8 & 0) agi tembangba garitem dang senzütsü.

Nagaland state sorkari agütsüba sangdong nung tenokdangba kübok madenertem iba inyakim sülen manidaksü aser ketdangtsür o staff ajaki Identity Card bener senzütsüla, ta iba tetuyuba alema inyakertem MV Act 1988 nung U/S 177 aser 179 kübok merenshitsu.

Külen, Kohima Deputy Commissioner aser DTF

Kohima Chairman, Gregory Thejawelie NCS-ia tanü sangdong ka ajanga May 5, 2021 nungi night curfew tenzüka osang metetdaksüogo.

Kohima District nung aonung 7:00 ako nungi anepdang 6:00 ako tashi night curfew alitsü saka iba mapang medical, emergency & essential services aser khu abenba garitembo curfew nung madener, ta DC Gregory Thejawelie-isa.

Iba tetuyuba alema inyakertem Disaster Management Act 2005 nung Arlla 51 nungi 50 aser IPC nung Arlla 188 kübok merenshitsu, ta paisa shisem.

Linük aikati India nem Medical Supplies bener yoker

New Delhi, May 4, 2021 (Agencies): Mongulbarnü US, Ireland, United Arab Emirates aser Kuwait dena linük balalai India nem medical supplies bener yokogo.

India kübok state aser union territory aika nung mozü kitem nung COVID-19 agi shiranger mesemi nungtepba mapang ka nung linük balala nungi teyari balala arur.

Mongulbarnü Gujarat nung aliba Mundra Port nung Liquid Medical Oxygen (LMO) metric tonne 20 abenba tanker 7 tonga aru.

"Comprehensive Strategic Partnership akangshio. 20 MT Liquid Medical Oxygen (LMO) abenba tanker 7 Mundra Port (India) tongogo. Iba ya India dangi mezüingbuba LMO bener aruba lir. UAE-i yariba atema kanga pelar" ta External Affairs Ministry Spokesperson, Arindam Bagchi-i metetdaksü.

Tesüiba anogo 10 tsüingda Germany, US, UK aser Singapore dena tanga linüktem nungi medical equipment 190 tonne tema tayimtsütem ajanga bener aruogo, ta Air India-ia metetdaksü.

Assembly election agiba sülen totzü jenjang atur

New Delhi, May 4, 2021 (Agencies): India nung state pezü aser Union Territory ka nung Assembly election agiba sülen petrol aser diesel jenjang tuogo.

West Bengal, Assam, Kerala, Tamil Nadu, aser Puducherry nung assembly election indang results Deobarnü azüingba sülen Mongulbarnü oil marketing companies (OMCs)-i petrol

Tesüiba anogo 10 tashi onoki linük balala nungi oxygen concentrators, BiPAP machines, aser ventilators bener aruogo, ta Air India-isa ashi.

"Hong Kong, Germany, USA, Singapore, Dubai, London aser ano tanga linüktem nungi 190 tonnes tema medical equipment bener aruogo" ta parnokisa metetdaksü.

"Ireland nungia oxygen generators 2, oxygen concentrators 548, ventilators 365 aser tang medical equipment bener aruogo. Asen EU partner Ireland-i teyari agütsüba atema kangasa pelar" ta Spokesperson, Arindam Bagchi-isa ashi.

Indian Air Force tayimtsü ka nung United Kingdom nungi oxygen cylinders 450 bener Chennai tonga aruogo. Kuwait nungia oxygen cylinders 282, oxygen concentrators 60, ventilators aser tanga medical supplies bener aruogo, ta paisa metetdaksü.

Hombarnü European Union-ia India nem emergency medical support talila agütsüba osang metetdaksüogo.

Iba teyari kübok Denmark-i India nem ventilators 53 aser

Spain-i oxygen concentrators 119 aser ventilators 145 agütsütsü.

Netherlands-ia India nem oxygen concentrators 100, antiviral drugs Remdesivir 30,000 vials aser ventilators 449 yoktsü, ta EU-i ashi.

Maneni, Amazon, Temasek Foundation, Phillips, Mahratta Chamber of Commerce Industries and Agriculture (MCCIA) aser World Hindu Council of America teloktemi Air India ajanga tang nungdakba medical equipment aser tanga supplies bener yokogo.

Mongulbarnü India nung COVID-19 puteter nisung crore 2 ajangogo. Tesüiba anogo 15 tsüingda nisung lakh 50 tema dak COVID-19 aliba putetogo.

Tanü tashi nung India nung nisung 2,02,82,833 dak coronavirus putetogo aser Mongulbarnü nisung 3,57,229 dak puteta liasü, ta Union Health Ministry-i metetdaksü.

Tanü nisung 3,449 asüba züingsema COVID-19 agi shiranga asür ajak agi nisung 2,22,408 kümogo, ta Union Health Ministry-isa ashi.

80.91 agi ayoker.

Sorkar meyong OMC asem-Indian Oil Corporation Limited (IOCL), Bharat Petroleum Corporation Limited (BPCL) aser Hindustan Petroleum Corporation Limited (HPCL)-i election mapang totzü jenjang nung mekongshi.

Ajisüaka, OMCs aser sorkari election aser totzü jenjang tsüingda tesentaktep kecha mali ta ashir.

LRD Dimapur ajanga Coffee/Rubber machine lema agütsü



District Project officer, LRD Dimapur Office nung May 04, 2021 nü LRD Dimapur ajanga teyari agütsüba sentong ka agidang alakteta jaoker den DPO Dimapur, ketdangsürtem aser tajangzük angurtem külemi tangokba noksa ka yangi angur.

Dimapur, Monupii/May 04 (TYO): Government of Nagaland, Land Resources Department Dimapur ajanga May 4, 2021 nü Rubber Roller machine 65 aser Coffee Pulping Machine 25 tashi (100% subsidy) lema agüja liasü. Iba sentong nung tetushi tesemdang ADC Dimapur, Atokhe Aye aser alakteta jaoker DHO Dimapur, Temsu aser DPRO Dimapur, Lolano Patton nungertem liasü.

Sentong nung jembiba mapang tetushi tesemdang-i tajangzük angurtem dang gol tajungtuba nung amshia pei

wadang nung takok angütsü aser pei sasa aayanga litettsü ajungshia liasü.

Land Resources Department ya aluyimer nem teyari agütsüba department ka lir, anungji department nungi teyari anguba agia tarütsü nunga teyari agitettsüa ochishia mapa shidak inyaksüla, ta pai aluyimer dang ashi.

Atokhe-isa sentong nung adenertem dang pei aliba tesem nung COVID-19 tashidak nungi jembua alitsü atema nüburtem nem awareness agütsütsü ayongzük liasü.

DPO Dimapur, I. Acato

Chishi-i tajangzük angur dang sorkari agütsüba gol kumdanga amshitsü ayongzükba mapang, gol nung GPS tracking inoktsü alinung aluyimer jenjang ajungkettsü atema sorkari agütsüba gol ya dangar nem mamshidaktsütsü shia liasü.

Tarütsü nunga bendanga agütsür nendaka inyakba aluyimertem shimtetsü, ta pai ashi.

Iba sentong nung Kimiyekato Shohe ajanga Coffee Pulper aser Rubber Roller Machine amshiyim sayua liasü aser A.I, Aoyanger ajanga tepela ankep o jembia liasü.

Anogo 14 tsüngta State Merit Scholarship (Post Matric) lemjang: ANCSU

Dimapur, Monupii/May 04 (TYO): All Nagaland College Students' Union (ANCSU) ajanga Director, Higher Education, Government of Nagaland dangi kaketshir nem tekeratiba nung State Merit Scholarship (Post Matric) 2021 lemjang, ta zülü nung takhangba agütsüo.

Küm shia kaketshir nem scholarship menur lema agütsüba mapang department ajanga tatemtsü o tasen balala amshia aruba yimya kumogo, aser ano State Merit Scholarship 2021 lema agütsüba mimh menuba atema ANCSU kanga jashir, ta ANCSU tir Vimeyiekho Vitso aser repsem

zülur Inagha Kinny nati Director, Higher Education dangi züluba shidi nung shia lir.

Iba shidi züluba anogo nungi tenzük a anogo 14 tsüngta department-i State Merit Scholarship 2021 melemstetra, ANCSU-i democracy yimya nung longkak aittsü, ta metetdaksü.

District Task Force Longleng senden menogo

Dimapur, Monupii/May 04 (TYO): District nung COVID-19 positive cases tali akumba ajanga District Task Force Longleng aser lokti tentet balala ajungben senden ka May 03, 2021 nü Deputy Commissioner aser District Task Force, Longleng mendenpuba, M. Shayung Phom lenisüba kübok mena liasü.

Iba senden nung pangzüngba onüktem yamai alitsü:

1. Dokan kibur, bus/taxi anishr, lenmang yanglurtem, hotel/restaurant nung inyakerem densema High Risk Group dak Medical department ajanga tapi agi COVID-19 tashidak tendangtsü.
2. CCC aser COVID-19 hospital duty inyaksü nungloksüba Medical & Police/ VGs personnel nem chiyongtsü ya DTF ajanga

nisung shia sen 300 jenjang nung renemtsütsü.

3. Longleng jila nung nüburtemi maneni COVID-19 nungi jembua alitsü yimyatam amshitsü atema DBs aser VGs temi police den yaritepa duty agütsütsü aser pei department ajanga anogo alemtsü.
4. Mejangjaba nisung senzüba mitsü atema yimtsüng ajunga nung Village Guard tenzüksü aser ketdangsür nem osang agütsütsü.
5. District nung lokti sentong/benjongbentsü ajak nokdang aser kiyimba benjong agitsü atema anogo 15 jelia DTF dang nungi temelaba agitsüla.
6. Tamlu circle kübok Shetab aser Yonglok nung aliba Entry/Check gate ya yangji aliba Administrative aser Police Officers temi

anepalutsü.

7. Containment zone alema orr alidak tekülem ki lapoktsü melatsü, saka mapang ka nung iba amala ki nung asema shilem 30 mesüra nisung 100 (koba tajemba südir) melatsü, saka COVID-19 tashidak prokshiba azüoktsü atema SOP ajunga amshitsüla.
8. Tang atema anogoshi lapokba local market ya Public Ground, Longleng Town-i belenogo.
9. Nüburtem aliba tesem, mapa inyakdak aser gari nung senzüba mapang mask shidaki agia alir dang senchi sen 200 meshitsü.
10. Colony/Ward tir/Chairmen ajaki COVID-19 dak sendakba tatalokbatem mita atar ketdangsür nem tekeratiba nung osang agütsütsüla.

Lengrijan nung COVID-19 totuyuba shidak amshitsü Dimapur, Monupii/May 04 (TYO): Lengrijan village council pur May 4, 2021 nü senden amenba mapang Nagaland sorkar aser District Task Force Dimapur ajanga nüburtemi inyaksü tetuyubatem shidak amshitsü pangjema liasü, ta sangdong ka ajanga ashi.

Council ajanga yimtsüng telungzük nung item mera shidak amshidaktsütsü aser mita alitsü, ta ashi.

Tarütsü nung osang ka magütsü tashi dang district aser

state nungi shinga yimtsüng telungzük aittsü memelatsü, ta Council ajanga lemteta liasü, ta chairman, Lengrijan village council, T. Anung Pongen aser secretary Ayimsalang nati sangdong nung metetdaksü.

Dokan kibur ajak aser talisa ku mejepbatesem nung mask agitsüla, sanitizer amshitsüla aser social distancing yimyatam amshia COVID-19 indang SOP tem sülen anidaktsüla, ta sangdong ajangasa ashi.

Phek aser Kiphire nung African Swine Flu pokteta lir

Dimapur, Monupii/May 04 (TYO): Deputy Commissioner, Phek ajanga Phek district nung aliba nüburtem dang sangdong ka nung, Phek aser Kiphire district nung African Swine Flu pokteta lir, ta metetdaksüo.

Iba dak sendakba nung nüburtem dang kanga kumdanga aser jeret-pereta alitsü aser ak tali-tapong asüba osangtem lira Office of the Chief Veterinary Officer, Phek nem metetdakang, ta ashi.

Iba menatepa aoba tashidak azüoktsü mechi district nung nüburtem aser ak metsürtem dang tsünglanglen shia aliba meratem agitsü metetdaksü:

1. Iba tashidak (African Swine Flu) ya kanga kera menatepa aoba wara ka lir

aser anepalutsü yimya mesüra mozü mali, anungji tashidak agi menepba ak noklang nung noklang shilem asür.

2. Iba tashidak samadaksütsü lenmang ajak agi kumdanga bio-security meratem agitsüba dang lir.

3. Putu menden, nübur aser ak metsürtemi ak tali-tapong asüba osang lira, anasatoba veterinary health centres nem tekeratiba nung metetdaksütsüla.

Chief Veterinary Officer-i tensa asadangtsü aser African Swine Flu prokshia aoba azüoktsü atema awareness agütsütsü, ta sangdong ajanga ashi.

Aoyimkum Village Council-i pelaba metetdaksür



May 4, 2021 nü Aoyimkum Baptist Arogo Pastor nem Covid-19 Vaccine agütsüdang agiba noksa angur. (Dimapur, May 4)

Dimapur, May 4, 2021 (TYO): May 4, 2021 nü Panchayat Hall, Aoyimkum nung aliba Aoyimkum Sub-Centre nung COVID-19 vaccine agütsüo.

Health ketdangsürtemi anibelem arema aser tasü itta COVID-19 wara anema inyaka aruba atema tenüngsang agütsür ta Mongulbarnü Aoyimkum Village Council-i

sangdong ka nung metetdaksü.

"Iba mapa takok ngua inyakba atema Chief Medical Officer, Dimapur Dr Mereninla aser District Immunization Officer, Dr Rebecca nati anir Aoyimkum Sub-Centre nung staff ajak dang pelaba metetdaksür," ta GB. Aoyimkum village Nungsangtoshi aser Secretary, AVC Putunungsang Lkr nati sangdong nung ashi.

NSCN/GPRN (Reformation) ajanga Miu benjong salem abener

Dimapur, Monupii/May 04 (TYO): NSCN/GPRN (Reformation) ajanga Khiamniungan Naga nung dangi tepela 'Miu' benjong salem abener, koba May 5 nü amunger, ta NSCN/GPRN (Reformation) indang MIP (Ministry of Information & Publicity) ajanga sangdong ka nung ashi.

Metsü yokba mapang alu junga arütsü asoshi temoatsü meshia iba Miu benjong ya amunger. Ajidang masü senmanger aser kinungertem

den tesendaktep tali akhangshitsü nükjidong nung iba benjong ya amunger. Iba mapang senmangertem yimchiyimjung aser tsükchir madak takok angütsü tashi jazüka sarasademtsür.

Iba benjong ajanga sayuba ama maneni Naga nung tsüngta tesendaktep tali tashi itshitsü aser meimteptsü atema asen Khiamniungan adianutem dangi yimchiyimjung, tashi aser anema aliba temoatsü lidakjangma, ta sangdong ajanga ashi.

Manipur-i Assam nungi oxygen metric tonnes 3 angu



Imphal, May 4 (Agencies): Manipur-i Assam nungi tanü oxygen metric tonnes 3 nguogo. COVID-19 wara mapang Assam nung perira anüngtsüsa inyaktetba ajanga Northeast nung alirtem yariteter, ta Assam state health minister Himanta Biswa Sarma-i ashi. "Assam-i Manipur nem

Oxygen MT 3 agütsütetsüsa renema liasü aser iba tepela osang metetdaksür. Onok perira anüngtsüsa inyaktetba ajanga North East region aser tanga tesemtem yariteter. Asenok longjemer Covid19 madak takok angutsü" ta paisa metetdaksü. "Nagaon aser Silchar nungi

kanga nüngdakba oxygen anguba atema Sarbananda Sonowal aser Himanta Biswa Sarma na dang kanga pelar. Nenoki iba tensa nung yariba ajanga NE Region nung state tem amalitepa aliba tamaitüsü" ta Manipur Chief Minister Biren Singh-ia metetdaksü.

Assam nung COVID-19 tensa tamajung akümer: Himanta Biswa Sarma Tanü nungi SOP tasen aika agütsür; Night Curfew tenzüker

Guwahati, May 4 (Agencies): Assam nung COVID-19 tensa tamajungba akümer ta Assam Health Minister Himanta Biswa Sarma-i metetdaksü. Himanta Biswa Sarma took stock of the preparedness at the GMCH.

puteter aser tensa tamajung akümer. Ajüsüa onok renema lir" ta pai ashi. COVID-19 tensa tamajungba akümba agi Assam state sorkari SOPs tasen kar metetdaksüogo.

dang office-i aotsü" ta SOP nungsa shia lir. May 5, 2021 anepdang nungi SOP tasen mapa küma tenzüksü.

Mongulbarnü Himanta-i Gauhati Medical College Hospital (GMCH) semdangba sülen iba osang ashi. Paisa GMCH nung faculty aser Assam Principal Secretary for Health Samir Sinha den sendentem amen. "GMCH faculty aser Principal Secretary Health den senden menogo aser idangji ICU p Hospital beds amenoktsü atema jembi. Assam nung anogoshia nisung 5000 tema dak COVID-19

Assam nung dokantem aser shishilembadak nikongdang 2:00 ako nungbo shibangtsü aser aonung 6:00 ako nungi night curfew alitsü ta SOPs nung shia lir. "City bus, intra-district, inter-district aser inter-state bus nung driver ka dang aser passenger tem tsüngda tepila ayutsü" ta sorkarisa metetdaksü. "Anogoshia nija aser sorkar office tem nikongdang 2:00 ako nung shibangtsü. Ketdangsurtem dak alaka tanüngba mapa inyaker 50%

Hombarnü Assam nung COVID-19 agi shiranger nisung 29 asü. Tang tashi nung state nung nisung 1389 tashi süogo. Külen, Hombarnü Assam nung nisung 4489 dak COVID-19 aliba puteta liasü. Parnok rongnungi nisung 1645 tashi Guwahati yimti aser temeket nung alirtem lir. COVID-19 kanga putetba district tangatemji: Dibrugarh - 460, Kamrup-Rural - 239 Nagaon - 201 aser Nalbari - 201 liasü. Yashi nisung 4489 dak putetba züngsema Assam nung nisung ajak agi 26,477 kümogo.

MNF vice president Vanlalzawma-i mapa nungi anen

Aizawl, May 3, 2021 (Agencies): Hombarnü Mizoram National Front (MNF) vice present Vanlalzawma-i mapa nungi anenogo. MNF vice president Vanlalzawma-i Serchhip assembly by-election nung tamakok anguba sülen mapa nungi anen. Vanlalzawma-i party president aser chief minister Zoramthanga dangi shidi ka zülü aser iba nung pai pa indang teinyaktsü shitak meinyaktet ta shia lir. April 17 nü Serchhip by-election nung Vanlalzawma-i

Zoram People's Movement (ZPM) candidate Lalduhoma tsüingdang vote 3,310 agi tamakok angu. Vanlalzawma-i 1999 nungi 2009 tashi Mizoram nungi Lok Sabha election nung kümsük anaben tashi takok angu. Mezüing küm pai independent candidate ka ama aser tanabuba kümsük nung MNF züngsem ka ama toktepa liasü. Arishi küm 65 tain Vanlalzawma-i 2013 küm Aizawl West-III constituency nungi toktepa takok angu aser kümsük ka atema opposition leader inyaka liasü.

Akhil Gogoi tetsü Priyoda-i Sivasagar semdang State sorkar dang vaccine angati agütsütsü mepishir



Sivasagar, May 3, 2021 (Agencies): Taküm Assembly election nung takok anguba Sivasagar MLA Akhil Gogoi tetsü Priyoda Gogoi-i Mongulbarnü Sivasagar semdang aser idakji nübortem dang pelaba metetdaksüogo. Tang tepuokdak yua aliba lar jabaso nem Assam assembly nung züngsem kümdaktsüba atema Priyoda-i pelaba ashi. "Iba takok atema ni kanga pelar. Ni temang manemi liaka Sivasagar nung alirtemi timtem jenti arema Akhil nem takok ngudaktsüba atema pelaba ashitsü atema ni aru. Iba maparen nung nisung aikati bendanga agüja inyakba ni meteta lir. Tsüngremi nenok ajak moajangma" ta Priyoda-i ashi.

metetdaksü. "Ni nenok den meliaka, ni MLA ka inyaktsü takok ngudaktsüba ajanga Assam yimtenren putiotsü nung otsü tasen ka yangluogo" ta tanü pai Sivasagar nung dang shidi ka zülü. Akhil Gogoi ya December 2019 nungi Guwahati Central Jail nung puoka lir aser pai votes 11,700 den timba agi takok angu. "MLA ka ama ni sorkar dang panchayat aser town shia nung vaccination camps ayonga agitsü mepishir. Assam nung alir ka danga vaccine magii meyutsütsü atema iba mapa inyaktsüla. Nüngdak dang süra door-to-door inoculation programme tenzüksüla" ta Akhil-isa shidi nung metetdaksü.

"Akhil-i takok nguogo saka iba ya pai masü saka nübortemi pa atema raraba ajanga takok angu. Anungji iba ya nübortem indang takok lir. Tang pa MLA kümogo anungji nübortemi asüingdangtepa ketdangtsütsüla" ta laisa metetdaksü. "Assam tajung yangertsü atema maparen ajak nung ochishiba aser tashishitsü melii inyakdaksünür" ta laisa shisem. Priyoda Gogoi ya Jorhat district kübok Seleng TE nung alir aser lai nüboyimba sentongtem nung Sivasagar semdangogo/ Akhil Gogoi ya Guwahati nung aliba Gauhati Medical College and Hospital nung anepaludar. Tanü pai state sorkar dang Assam nung alir shia nem COVID-19 vaccine angati agütsütsü atema mepishia

"Assam nung aser ano linük kübok tesem balala nung alirtemi ni aser Rajgor Dal atema nüboyimtsüba atema pelar. Ruling party temi amokmeren aser tashiyim mapa inyakaka nenoki Assamese nungeri kodanga tangatetba memelenshir ta asüba sayuogo" ta paisa ashi. Paisa Guwahati nung aliba shisashir Haider Hussain aser lawyer Nekibur Zaman aser ano Bir Lachit Sena-i anir Sivasagar nung pa tenüing nung nüboyimtsür ajak dang pelaba metetdaksü. Sivasagar nung Akhil atema Narmada Bachao Andolan lennir Medha Patekar aser farmers' union lennir Sandip Pandey nati anir lanur aser kaketshir lennir aikati nüboyimja liasü.

GOVERNMENT OF NAGALAND
DIRECTORATE OF HEALTH & FAMILY WELFARE
NAGALAND: KOHIMA

NO.DHFW-IDSP/3/CONT-APPTT/2010-11/ Dated Kohima the 4th May 2021

ADVERTISEMENT

Applications are invited for filling up the following vacant post under Integrated Disease Surveillance Programme (IDSP), Nagaland.

Sl. No.	Name of Post	No. of post	Place of Posting	Salary	Qualification	Experience
1	Epidemiologist	1 (one)	District Surveillance Unit (DSU) Longleng	42,000/- per Month	1). Medical Graduate with Post Graduate Degree/Diploma in preventive and Social Medicine/ Public Health or Epidemiology (such as MD, MPH, DPH, MAE etc) 2). Any Medical Graduate (Any field) with 2 years experience in Epidemiology/ Public Health. 3). Graduate in AYUSH, Unani, Siddha or Homeopathy with 2 years experience in Public Health. 4). Any Graduate with a Post Graduate Diploma or Degree in Public Health or Public Health Management or Health Administration (in which Epidemiology has been a paper) with 2 years experience in field Epidemiology/ Public Health Work. 5). Post Graduate in field of Life Sciences, Social Sciences or Statistics related to Public Health with 2 years experience in Field Epidemiology/ Public Health.	Minimum 2 years experience in issues related to Public Health Programmes or Epidemiology

The application should be addressed to the Mission Director, NHM, Directorate of Health & Family Welfare, Nagaland, Kohima, Ruziezou, Kohima-797001 and should be received at the Office of the undersigned or can be sent by Mail to the ID given below on or before 8th May 2021. Canvassing in any form will not be entertained.

For more information:
 Contact : Office of the State Nodal Officer, IDSP
 Directorate of Health & Family Welfare
 Nagaland: Kohima
 Email: nlsu.idsp@nic.in

Sd/-
(DR. I. TALITEMSULA JAMIR)
 Mission Director, NHM
 Directorate of Health & Family Welfare
 Nagaland: Kohima

Issued by DIPR



TIR YIMYIM YIMOBILEM (EDITORIAL)

DIMAPUR RASEMNÜ, MONUPII (MAY) 05, 2021

Takok tajung

Tang Assam nung agiba election nung takok angurtem ajak rongnung takok tajungtiba angusangji tawa tentetba Raijor Dal nung tongti lenir, Akhil Gogoi-i Sibsagar assembly constituency nungi takok anguba ya asütsü. Pa den toktepertemji ka BJP nungi aser ka Congress nungi liasü aser pai pa den sashia toktepsang BJP candidate vote 11,875 agi akok. Atangji, pai anguba takok ajungbaji pai yimsü tesüdak BJP telok pur akokba takok kisung jagi masü saka pa ya tepoukdak lia election nung toktep aser kenüa temai adoka nübortem den ajurutepa nübo yima mesenzütet ser election agi aser takok angubaji, takok dang nungi tuluba asütsü. Pa tepuokdak lia election nung tokteptsü asoshi tenüng agütsüba anogo nung pa ket nung senjang kata mali asü aser pa bank account nung akaba sen ajak agi Rs.60,497 liasü. Pa ya Guwahati nung nungtugu Cotton College nungi graduate asüba nisung ka lir. Pa iba college nung azüngdanga, yangji College Kaketshir Telongjem nung tongti zülur liasü. Pai küm ishika jakdang Assam nung ola madokteti aliba nübortem asoshi ola adoktsütsü atema Krishak Mukti Sangram Samiti (KMSS)telok tentet. Iba telok yagi Assam nung lisopur aser aluyimertem asoshi temeten bushija aiben lokti senden ayongzüka jembi aser kodang center government-i Citizenship (Amendment) Act latet, iba ozüng anema pai anir Assam nung sashia nokdak. Iba jagi center government-i ajiloktsür, National Investigation Agency (NIA) nem pa pudaktsü aser tang tashi pa tepuokdak yua lir. Tepuokdak nungi bail nung mechiok nungji, temai adoka election nung nübo yima senzütsü mekoki aliba mapang, pai akokba takok topur ajungbaji, pa tetsü arishi küm 85 tain kati anir, Sibsagar yimdong sema par jabaso tepuokdak alisang asoshi nübo yimja senzübaji liasü. Atangji, India nung tepuokdak lia election nung tokteper takok angubaji 1977 küm Bihar nungi Lok sabha election nung George Fernandes-i takok anguba sülenbo, tang Akhil Gogoi anguba takok ya asütsü. Pa ya ashir auer aser nisung tepseter ka masü saka nübortem taküm aser rongsen kümzüka yutsütsü atema government-i latetba ozüng aser telemtetbatem anema nokdakba agi government-i tema nung mesenzüdaktsütsü atema alena ayuba nisung ka lir. Ajisüaka, pai par lima aser nübortem jenjang ajemreptsüba angudang ajemajema melitetter. Aji oda, election mapanga pa temai madoktetaka tepuokdak nungi pai nübortem dangi shidi zülu aser iba shidijji dang nübortem nem lema züngdaktsü. Arishi küm 46 tain, Raijor Dal tongti lenir, Akhil Gogoi ya nübor temeten asoshi pa taküm samatsüa mapayui nokdakba tasü tait lenir ka lir. Pai pa tepuokdak nungi chiokdaktsütsüsbaji masü saka par nübortem sensak aser tajemzük tia nung alena aliba nungi chioktsüsbajiang bilemer. Ashiko, pai tang yimsü tesüdak telok nung aden nungbo tepuokdak nungi odangang chioktsü saka pa atema aji tongtibang masü saka par nübortem pei lima nung sensoa memesük sensakba agi, pei temetena mengutet mezüngmeshidakja aliba purtem nemang tama nüchiso tia agütsüner. Akhil Gogoi den asenok taküm aser jakla medemdang dang, asenok asübo alemli yimten telok ka den tangatettep yanglur tepuokdak nungi adoker election nung adokba dang masü saka takar kümer lila. Pai anguba takok den asenoki anguba takoktem medemdangra, asenoki anguba takok yabo shitakba takok masü saka kar sen agi aliba takok, kar injang bomb agi khazükba aser poktetba takok, kar süng aser long amshia zükzükba aser onzükba takok aser kar senso tenüng amshia kar senso nungi jendoker anguba takok ta, takokbo takok saka Akhil Gogoi anguba takok ama masü saka takok taila lir. Aji oda, Akhil Gogoi anguba takok jagibo pa tepuokdak lia pai nübortem nem nüchiso agütsütsü saka aseni anguba takok yagibo asen nübortem dang masü saka asen dena alar jenjangi alur. Sibsagarji asenok atema talangka nung oa aliba bendang lima ka masü saka asen anasa asen lima amai aliba kidanger constituency ka lir. Akok nungbo, kenübo Sibsagar nung alir Raijor Dal lenirtemji bushia oagi mesüra asenok alidak jaoka, parnoki par lenir tepuokdak lia election nung adokdaktsüba tangatetba aser sentong yangluba shisatsüji angadanga angazüknütsüka bilemer.

OLEMSABANG

Tenzükba Nung Arok Shilem

~ Wati Longchar (Sernapore)

(Yashi adok nungi...)

Ochi ola adoktsüla

Lokti ka nung temelenshiji shirnok lokti nung tim shilem magütsüi atsüngzüka yuja lir, parnoki parnok temeten aser ochimashi anema ola adok nung dang temelenshiji bener arutsür ta angatetsüla. Anungji tetsürtem rongnung, nisung ka-anati dang masü, saka collective voice nungdak; khen lokti senden ka nung jembiba dang masü, saka temelenshi bener maru tashi ochi takhangba ola sabang balala nung adoktsüla. Arogo nung dang masü, saka yimden maparen ajak nung ola adoktsüla. Arogo nung tenzükeri dang masü, saka lokti balala nung tenzüker den lungjemer ochi akhangtsüla. Aor loktiba ya kanga dang "male dominated" aser tetsür mezüngoker, tat. agi., Ao Senden tabo asür saka tetsürbo metendaktsür, Ao Sendeni Watsü telungjem ban südaktsüba, 33% municipal nung tetsür nem lenisüba shilem magütsütsü ta noktakba sayur. Iba amala ochimashi mapa anema tetsürtemi dang masü, saka teburtemia shirnoki pei linük meimer aser tejakleni odaktsüner parnokia yabo tim masü ta ochi ola adoktsüla. Ola madokba ajanga tanü tashi Nagaland Legislative Assembly nung tetsür kata meshimdang, ABAM küm 150 junga arudang tetsür ka danga Ex. Secretary meinyakdangba, tanga department nung Secretary meinyakdangba aser tanü tashi tetsür pastor malibaji ochi ola makaba kulitem lir. Sabang balala nung ochimashi inyakyim aser itemji anema ochi ola adoktsü mapang tongogo. Ochimashi anema ola adokbaji Khristan kulisüba ka ta angatetdi.

Aotsür theology azünger BTh, BD/MDiv, MTh, DMin and DTh/PhD (1000 plus kümogo), item nung parnok ter agi DTh/PhD jenjang nguteta züngogo, saka kechiba parnok nem tenzükba mapa sadema magütsür? International aser national level balala nung leadership agütsütettsüsa zünger, aser inyaka aru, saka Ao limai aiterbo parnok tebur kübok alitsüsa akümer. Lokti kaji tetsür-tebur-lanur ajak meyokteper külenang akümer. Kasaji arogo nung tetsür-tebur meyokteper külenang akümer aser sentepi arurtemji tetsür teimba. Anungji tetsürtem nem tenzükba mapa, talisa pastor shimba nung marendaki amshitsü mapang tongogo. Nungloktsürbo takok ngua inyaktsü sempet akaba tazünger lanur aika lir. Anungji ABAM kübok 50% tetsür pastor südaktsütsü leman bushitsüla, aser kokra ABAMi tapet telemtetba agia leman tuyutsü nungdak. Arogo kwika nung pastor bushidagi, item arogotemi tetsür pastor shimtsü ayongzüker. Ano ABAM nung department balala nung secretary tetsür shimtsü nungdak ta ajiteter. Yamaji inyakra ABAM aser arogotem nung temelenshi aika adoktsü.

Tenzükba mapa ya khonang-naroküm mapa ka masü, tashitoktepba, sentsü sayutepba mapa ka masü, saka ajemalua taküm bendanga nübur shi aser tanela nung mesüba mapa ka lir. Teburi matongba aser meinyaktetba aika tetsüri inyaktettsüsa tenzükba mapa aika lir. Anungji Tsüngrem sentsüwangshi tali jungkai adokdaktsütsü asoshi arok meyong kümndi. Deacon nunga tetsür, youth 50% bosa agidi, toklang tenzükera 50-50 tetsür-tebur shima aroki teka amteper tenzükba mapa inyakdi. Tsüngremer tajaba mapa nung shianga atsüngzüka meyutsüli. Tenzükba nung tetsür-tebur tebendang mali Tsüngremer arogo yangerdi ta ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pakistan nung Italy nung missionary, Amato Covid agi asü



Pakistan nung Italy nung missionary, Aldino Amato asüpila sentong nung tangokba noksa nung angur.

Lahore, May 04, 2021 (Agencies): Pakistan nung Italy nung missionary ka asüba atema tang Pakistan nung Khristantemi mangyimdar; missionary, Aldino Amato-i küm 60 dak tema Pakistan nung tenzuka aruogo.

Faisalabad Arogo nung bendanger missionary tem nung tatembangbuba, Aldino May 1 nü Lahore nung aliba hospital ka nung asü. Pa dak coronavirus tashidak putetba sülen pa anogo 10 tashi ICU nung monga liasü.

Arrshi küm 90 Khristan putir, Aldino Amato tasü mangji pai yanglua aliba leper nung arem. Punjab province kübok Okara 6 Chak yim dak Our Lady of Mercy Arogo compound nung pai jelia leper yanglur liasü.

"Pa tasü mang nung tekongshi mesüra asüpila sentong nung shilem tagi. Putirtemi dang pa tasü mang abentsü," ta lenirtemi jelia metetdaksür liasü.

Missionary Amato asüpila sentong nung putir 20 shi dang aden.

Faisalabad nung tongti putir, Indrias Rehmat-i, "Pai (Aldino) kanga melungsoa kanga tezülen aliba tesemtemi senotsü yok, aser item tesem nungji nisung

oa alitsü tenzuka liasü. Pakistan Arogoi pa teti bilemtetsü. Pa kanga tongmelang nisung ka liasü, aser pai ola madoki temeim mapa kanga inyakba den külemi shisaliok kanga renlok daksüogo. Asenok aikati bendanglen ang oa liner saka missionary (Aldino)-ibo asenok den aser sensakertem den külemi alitsü dang jangra liasü," ta ashi.

Missionary Amato 1962 küm Pakistan-i aruba sülen pai Tenla ki trok, school asem den hostels, nükpokertem atema training center ana, kiyong ana nung sensakertem atema ki aser tetsürtem atema college ka yanglutsüogo.

Paisa carpet atakba gol amshitsü training agütsüba den tanurtem nem carpentry aser tailoring training agüja liasü. Iba dak alia pai yimtsüng aika nung Adult education centers amenoktsüogo.

Khristan putir, Iftikhar Moon-i 2006 küm zülua adokba kaket 'Mard-e-Ahan' (The Iron Man) nunga missionary Amato-i inyaka aruba mapatem indang aika shia lir.

Putir, Younas Shahzad-i, "Tamangba yimsü balala nungi süaka pai sensakertem ajak

kasa dang nungita yaria aruogo. Pai ki tashi oa tanurtem ayongdena school-i arudaksü. Timtem mapang nung nisungtem pa ajurua pa den tebilemtsü lemsatepa liasü, aser pai kibong aika nem ita shia angati rations agütsü. Pai arem nung 'tube wells' (tzübo) aika yanglutsüba agi nisungtem yangji oa ali tenzük," ta metetdaksü.

"Anasa aliba yimtem nungi kaketsirtem arua pai yimtsüng nung amenokba college ji asadanga liasü. Nüngtugu missionary-i tenzuka yutsüba mapa tajungtemji maneni onoki inyaktsüla. Onoki pa nem akhüm agütsür," ta putirisa lemsatep.

Tang Pakistan nung ketdangsertemi coronavirus tashidak tasembenbubaren prokba nokdangtsü merangdar. Tang linük nung coronavirus case ajak agi 800,000 dak tema lir aser iba tashidak agi nisung 18,000 süogo saka nütsüng shilem ishika nem dang coronavirus vaccine agütsüogo.

May 2, 2021 nü Federal Planning Minister, Asad Umar-i, iba wara nokdangtsü atema taruba hopta anaji kanga tongtibang asütsü, ta metetdaksüogo.

Hindu nungertemi Nepal ya Hindu linük kümdaksütsü meranger

Kathmandu, May 04 (Agencies): Nepal linük nung Hindu yimsü alia amangertemi iba linük ya Hindu linük kümdaksütsü nükjidong nung Khristan melungtet telok (NGOs) aika anendaksütsü atema kanga tashishitsü document ka adokogo, ta International Christian Concern (ICC)-i osang ka ajanga metetdaksü.

Iba document ji ajanga Nepal Christian Society aser National Churches Fellowship of Nepal tenüng menüktsür. Iba document nung shia aliba agi, Nepal linük nung Khristan telok balalai Khristan yimsü dangi meyidaksütsü nükjidong nung lisopurtem tsüngda telemsa adokdaksütsü meranger.

Taoba ita (April 5) Hindu yimsü alia amanger telok-Rastriya Prajatantra Party (RPP)-i document ji Facebook nung lemsatepba sülen social media nung kanga prokshio. Iba mapang nungjagi tenzuka RPP-i sorkar dang Nepal Christian Society aser National Churches Fellowship of Nepal registration anenjang, ta takhangba agüja arudar.

Osangbener den jembidang Nepal Christian Society Executive Secretary, Mukunda Sharma-i, "Police ketdangsertemibo Hindu nationalist political party lenirtemi iba document nung shia alibaji tiyazü ta bangjemogo, ajisüaka parnok anema ken o benoktsü aser

temerenshi agütsütsü atema police-i memelunger," ta metetdaksü.

"Iba document ji tiyazü ta sangdong ka agütsütsü atema telok anapronglai (Nepal Christian Society aser National Churches Fellowship) telemtetba agiogo," ta Sharma isa metetdaksü.

Nepal nung Hindu yimsü alia amangertemi iba linük ya Hindu linük ka kümdaksütsü atema nükjidong yur inyaker.

India nung Hindu teloktemia pusema RPP-i Nepal sorkar dang anti-conversion ozüngtem benoktsü atema mepishir aser Hindu nung asalentongtem benoker, aser ibaji ajanga linük nung Khristantem anema inyakba kanga bulua kümogo.

ANOGO ABEN TSÜNGREM DEN

Ni Aiatai

Idangji ni ashi, Ni aiatai! Kechiyong ni makaka; kechiaser ni temeli memerükba nisung aser ni temeli memerükba pur rongnung alir; kechiyong kü tenük agi chuba temeranger telok Kibuba nguogo. Isaia 6:5.

Tamaren Tsüngrem anguba agi temenen tali jangjaa angatetdaksür aser shidakba peiji angur. Tsüngrem nema anguba agi temenen süoki ia mebilemer aser pei shidakbaji mejangjadaksür. Isaiai tebang agi meshitetba Tsüngrem sentsüwangshi mangu tashi pei sasa temeshi ta bilemba nung temulung süa liasü südi. Isaiai Tsüngrem tsüktepba agi idangyongjisa pa koda temenen aser pa meketa aliba pur koda memerük aji angu. Tsüngrem külemtsü aser memelenshir dang alitsübaji tamakoktsü. Asenoki shidakba Tsüngrem külemer ta sayutsübaji temulungjang melenshibaji lir.

Asenoki temenen alima den asenok sasa hai aura akar aser temenen taküm alir asü? Kar Tsüngremi aginüba taküm alidang asenok Tsüngremer jenjang nungi ajemzuka lua alir aser tajung junga aliba nisungji temeshi ta aseni repranger asü? Asenoki asen meketa alirtem den dang asenok temeshibaji medemdangra, asenok bendanga meshitetba aliba taküm ka lir ta amangdakja asenok ashioktsütsü akok. Aji saka kodang asenoki Tsüngrem ajurudir, asenok telangzübaji "Ni aitali!" ta alitsü.

Nai meketa aliri na aser alimaji balala ta majitetdaksü tashi na meketa aliri Yisu Khrista dak amangbaji nai mangutsü. Tsüngremi Pa temeshi aliba ama na meshitetdaksüner. Kodang Tsüngremi ne dak mapa inyakdir, idakji temerüktetba ne taküm nung alitsü ibaji alimai agütsüba dang nungi balaka asütsü. Alima, na meketa alirtem dena, ne temeshiba taküm jagi temeshi Tsüngrem tenzüktsü pua arutsü.

OFFICE OF THE DIMAPUR AO BAPTIST AROGO DIMAPUR - 797112, NAGALAND DABA OFFICE AJANGA SANGDONGER

Temeim arogopurtem,

Yisu Khrista temeim salem DABA office ajanga arogopurtem ajak dangi bener arutsür. Küm tenzük ita pezü tashi Tsüngrem taochi nung asenok kümzuka len ania aruogo, Tsüngrem temeim tulu asoshi maneni asen Tsüngrem tenüng ulutsüdi. Tanep-a iba osang kaket ajanga asen arogopurtem ajak asoshi nungdak ka lemsateper.

Covid 19 tashitak kanga prokshia tensa mejungi akümba yong, asen lima Bangtak amertemi nüburtem ajak kümzuka ayutsü meji, anogo tenet asoshi teinyaktsü kar agüja lir aser iba tetuyuba ajanga lokti tekülem magitetsüsa akum nung, taoba mapang ama tekülem kibongisa bener arutsür. Anungji pei kidang kinüngertem ajak longjemer sentong tajung renema agiangma. Tsüngrem o aki ama YouTube ajanga yoktsü aser Tekülem nung atentsü asoshi Ken Number teküboklen agütsür.

Kibong tekülem asoshi ken number.

Anogo	Tetenzük ken	Tatem ken
8th May - Honibar	369	397
9th May - Deobar	347	345
12th May - Bodbar	137	196

Takoksang Tsüngremi arogopurtem ajak kümzuka yujangma ta sarasademtsür.

[Signature]
Rev. I. Wati
Pastor



Ph. No. 03862- 248332 | Email - daba.arogo@gmail.com |
daba@dabaarogo.org | Website - www.dabaarogo.org


OLONG PAITEP # 5802

	1				2			3		4
5								6		
7			8							
								9		
		10								
11										12
					13					
					14					
15										
					16					

TIPLÉN		LANGTSÜNGLEN	
1. Balaka	- (5)	2. Hai sür inyak	- (4)
6. Aika shirangba	- (4)	3. Aor tenüing ka	- (6)
7. Tar tatsü	- (6)	4. Ali telungi talangka lur	- (5)
9. Nenü'er jabaso	- (4)	5. Tebang kenyongi mazüoker	- (4)
10. Sen latettsüba	- (7)	8. Ken atema anenzükertem	- (5)
11. Tangar kübok alir	- (4)	9. Toktepa noktak	- (5)
14. Lon nung inokba	- (6)	10. Sen	- (6)
15. Tzü ayimdak	- (4)	11. Benjong agi	- (5)
16. Ajok	- (5)	12. Telung nung rizünga ayu	- (4)
		13. Tebang nung enok	- (4)

OLONG PAITEP # 5801 TELANGZÜBA

TIPLÉN :		LANGTSÜNGLEN :	
1. Aben, 4. Artsü, 7. Lisem, 8. Liwa,		1. Aruli, 3. Balala, 5. Suwar, 6. Belem,	
9. Sarasadem, 12. Aket, 14. Mangu,		9. Süjak, 10. Aonung, 11. Dokan,	
15. Anünü, 16. Ango.		13. Tinu.	



AADHAAR CARD LIRBO KECHA TEBILEMSTÜ MALI

Alokba : Kiyonger amitsür, nakisungsuaka pelaseto lidarsüdi?

Amitsür : Kechi pelatsüaka! kisungi kibong khuret ajunga bener alirji chia pangnanga mechiyunger, amua junga mao lidarno! nenok yimsusuridanga ken kenbo semdang masüjito na!!!

Alokba : Na kechiba shisabulur? Aadhaar card lirsudito! Ena, na Aadhaar card lira no1, na kongi oner otettsü, no2, jang, K, oil Dal, chini ajunga angutsü, no3, Bank dena Aadhaar link sura teperi, pan card dena linksura ojang, no4, ano covid vaccine agiba dena Aadhaar link lira kecha metsübutsü, no5, Na ne kisung suaka Aadhaar card bena lira nebuba nena alir ama asütsü, no6, Kibong tasen akümtsüpura tena rongnung ka mesüra ka soru tamajung liaka pa mesura laji medeni pa/la Aadhaar card jidang amer sapangjagi yoktettsü, no7, Aadhaar card lira tanular lenmanga sdema lapoktettsü amaidang saputepbaya koda! na kecha tesensenma no!!!

Amitsür : O Alokba!!!!

Lilir : I. Kilang Ajem, Indisen, Dimapur.

TANÜBO NAI LANGZÜANG

Q. National Institute of Disaster Management ya koba nung amenoka lir?

A. Mumbai B. Kolkata C. Chennai D. New Delhi

(Taruba adok nung onoki langzüksü)

YASHI ADOK TELANGZÜBA : China

AO OSHI ANGAZÜKDAK:

TANÜ ANGAZÜKTSÜBA OJANG



Danü
(n) Kidang koya achiba shiruru
* Narolai **danü** kanga meima anepalur.

Tanü
(adv) tang telidakba anogo (today)
Tanü anogo ya kü tasoba anogo lir.

NAI-A YA METETTER MA?

NETFLIX SABANG AJANGA SAYATSÜ IBA SHOW ASER MOVIE KAR: MAY 2021

(Yashi adok nungi...)

* May 14

- Ferry - Netflix Film
- Haunted: Season 3 - Netflix Original
- I Am All Girls - Netflix Film
- Jungle Beat: The Movie - Netflix Family
- Love, Death & Robots: Volume 2 - Netflix Original
- Move to Heaven - Netflix Original
- The Strange House - Netflix Film
- The Woman in the Window - Netflix Film

* May 16

Sleight

* May 18

Sardar Ka Grandson - Netflix Film

* May 19

- The Last Days
- Sabotage
- Small Town Crime
- Who Killed Sara?: Season 2 - Netflix Original

* May 20

- Hating Peter Tatchell
- Special: Season 2 - Netflix Original
- Spy Kids: All the Time in the World

* May 21

- Army of the Dead - Netflix Film
- Jurassic World Camp Cretaceous: Season 3 - Netflix Family
- The Neighbor: Season 2 - Netflix Original

* May 22

Sam Smith: Love Goes - Live At Abbey Road Studios

* May 23

Master of None: Season 3

(Maneni asung adok nung...)

SUDOKU # 5845

TELANGZUBA # 5844

		6	9	2	3				4	8	9	6	1	2	7	3	5
		2		6	1	3	4	5	3	1	5	4	7	9	8	2	6
	1		4		5	2		6	2	6	7	5	8	3	4	1	9
	3						8		9	3	6	8	2	4	1	5	7
7	4		5		6				5	4	1	7	3	6	2	9	8
								9	7	2	8	9	5	1	6	4	3
	6		8		4		7	2	8	9	3	1	4	7	5	6	2
2	8	9	6		7	4		1	1	7	2	3	6	5	9	8	4
	7	4	2		9		6	8	6	5	4	2	9	8	3	7	1

OJANG LUTEP # 5388

- KÜTAM :
- UNNG :
- NGASMAHI :
- RAMESÜ :
- NGUMEI :
- IRLA :
- EMJITI :
- HIAATIS :
- ITSJEMBÜ :
- AKTAS :

OJANG LUTEP TELANGZÜBA # 5387

TAJUNGLANI MASÜ TAMAJUNGLANI BILEMA JEMBITETER TELOK RONGNUNG TIA MAKAI DENSEM

TAN HOPTA ATEMA - KOMA SÜLA ?

Q. Asen lima nunga Covid-19 tashidak wara agi amokmeren tialong nung assembly election agi nunga koma süla ?

Olong 20 shi nung May 07, 2021 tashi nung iba telangzuba ya onok dangi (e-mail - tiryimyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzubatemi taruba Honibarnü adoktsüsü.



Ireland nungi tang agi tanabenbuba oxygen generator 2, oxygen concentrator 548, ventilator 365 aser tanga medical equipment tem India tonga bener aruba noksa nung angur.

PM-i Bengal nung tatalokba tem shisabulua bilemba lemsatep

Kolkata, Monupii/May 4 (Agencies): West Bengal Angh Jagdeep Dhankhar-i Mongilbarnü ashiba agi, Ato Kilonser Narendra Modi-i pa dangi call süogo aser state nung election tembangba sülen temzüng ozüing dak sendakba nung mepetmesü adokba ajanga pa shisabulua bilemba lemsatepogo.

"PM-i call asü aser temzüng ozüing dak sendakba nung tensa mejungi akümba ajanga pa shisabulua lemsatepogo. State nung nisung tepsetba rakzükrakdemba maneni odar aser iba atema shisabulua bilemer. Iba dak sendaka alirtemi jenjang tapet agia tensa aziüoktsüla," ta Dhankhar tweet asü.

Mongolbarnü West Bengal Angh-i police aser Kolkata

Commissioner dang yimden yimsüsüba dak sendakba nung azütokshiba, kiojen raksatsüba, nisung tepsetba, lokti rong a tua inyaksangshitepba aser tangar amokmerenba anendaktsütsü tetuyuba agütsüogo, koba ajanga democracy maksüdaktsür.

Paisa, alima tesem balala nung prokshir aliba Bengali nungertemi state nung temzüng ozüing dak sendakba nung tensa mejungi kümer aliba angazüka shisabulua bilemba lemsatepogo, ta ashi.

Kasa mapang nung BJP lenir Swapan Dasgupta-ia, Calcutta High Court Chief Justice dang, assembly election tembangba sülen yimden yimsüsüba dak sendakba nung mangatettep adoker aliba tembangdaksütsü

atema ketdangsurtem nem tetuyuba agütsütsü asoshi mepeshia asüingdangogo.

Sitalkuchi aser Cooch Behar nung Hombarnü mepetmesü adokba osang angazükogo aser Nandigram nunga BJP indang party office raksatsüogo.

Deobarnü nikongtsütsü Haldia nung mejangjaba nisungtemi osangbenertem amakba osang angazükogo.

Tawa tembangba West Bengal assembly elections nung Mamata Banerjee-i aniba Trinamool Congress-i menden 213 kokogo. Bharatiya Janata Party-i menden 294 nungi 77 koka liasü. Ajisüaka Murshidabad nung menden ana atema election thinenogo, kechiyong iba menden ana nung tokteptsü pur ana covid tashidak agi asü.

Covid-19: India nung nisung lakh 3.57 dak tashidak potet

New Delhi, Monupii/May 4 (Agencies): India nung taoba ghonda 24 tsüingda nisung 3,57,229 dak tashidak potetba union health ministry-i

Mongolbarnü metetdaksüogo, koba taoba anogo ishika dang nungi tera agi tajemba lir. Mongolbarnü tashidak potetertem densema tang tashi nung India nung nisung 2,02,82,833 dak Covid-19 tashidak poteter lir.

Kasa mapang nung taoba ghonda 24 tsüingda iba tashidak agi nisung 3,449 asüba sülen India nung covid tashidak agi asür 2,22,408 jungogo. Linük

nung tang Covid-19 tashidak menar temang anepalua alir 34,47,133 lir, ta sorkar sangdong ka ajanga metetdaksüogo.

May 1 nü nisung lakh pezü tema dak tashidak poteta liasü saka yashi tashi nung 3,68,147-i aluogo.

Maneni linük nung nisung 3,20,289 anepogo aser ajak senteper tang tashi nung nisung 1,66,13,292 anepogo.

Indian Council of Medical Research (ICMR) sangdong ka ajanga ashiba agi, May 3 nü tashi nung India nung sample 29,33,10,779 tendangogo. Item sample tem rongnung 16,63,742

bo Hombarnü tendanga liasü.

India nung Covid-19 vaccine dose 15,89,32,921 dak tali agütsüogo, ta health ministry-i metetdaksü.

India nung tang coronavirus tashidak tanaben poktetshia azüoktsü mekoki kanga timtemtepba mapang lir aser iba ajanga linük health infrastructure chirepdaksüogo aser frontline medical workers tem alia belemtepdaki. Kasa mapang nung India timtem angateta alima linük balalai takokba tashi rongsen aser tenüingdakba osettsüt balalai teyari agütsüdar.

Delhi sorkari auto, taxi anishirtem nem teyari agütsütsü

New Delhi, Monupii/May 4 (Agencies): Delhi Sorkari ita ana atema ration card bena alir lakh 72 nem angati ration agütsütsü aser yimti nung aliba auto-rickshaw aser taxi anishirtem nem teyari sen 5000 agütsütsü, ta Chief Minister Arvind Kejriwal-i Mongolbarnü ashi.

Ajisüaka ration ita ana atema angati agütsütsü telemtepba agiba tetezü yimti ita ana mokdang ayutsü ta masü, ta pai ashi.

COVID-19 tashidak kanga kara menatepyonga aoba nokdangtsü atema linük yimtiba ya May 10 tashi mokdanga lir. Kejriwal-isa, Delhi nung tensa tajungba akümtsü aser yimti mokdanga ayutsü nungdak makai akümtsü imlaba lemsatep.

"Delhi nung ration card bena alir lakh 72 nem taruba ita ana atema angati ration agütsütsü. Ration ita ana atema angati agütsütsü lemtetba tetesü yimti ita ana mokdanga ayutsü ta masü. Tashidak menatepa aoba nokdangtsü atema onoki yimti mokdanga ayu aser takaratiba nung iba ya tembangtsü imlaa atar," ta pai shisem.

Maneni Kejriwal-i, "Taoba küm yimti mokdanga ayuba mapang Delhi sorkari auto aser taxi anishir lakh 1.56 nem sen 5000 (nisungshia) agütsüogo aser parnok nem teyari

agütsütsü atema taküma inyaktsü," ta ashi.

Tashidak menatepa aoba nokdangtsü atema Delhi sorkari yimti mokdanga ayutsü telemtepba agi, ajisüaka iba ajanga nisung kar atemabo rongsenketsüing nung tetsükdaktsü adoker aser talisa anogoshia ayanga chiyongertem atema kibong achaayangtsü tasak kümogo, ta pai ashi. Taoba hopta Delhi sorkari kisü-jensürtem nem teyari sen 5000 agütsütsü sangdongogo, ta paisa ashi.

Delhi nung tanga tensa kanga mejungi lir ta shi chief minister-i nüburtem dang mozük nungi yipden, oxygen, mozü bushiba mapang aser tenündaktertem nem chiyongtsü agütsütsü atema yariteptsü mepeshia metetdaksü.

Kejriwal-isa, political party tem dang nüburtem nem teyari agütsütsü ayongzükogo. "Ni political party ajak dang pai party ta asüba tangatetba toktsür nüburtem class, cast mesera tamangba yimsü memedemdangi teyari agütsütsü mepeshir," ta pai ashi.

Tang ya politics nung shilem agütsüba mapang ka masü aser BJP, Congress mesera AAP nung sendaka alirtem ajak longjemer wara agi kongshir alirtem nem teyari agütsütsü nungdaker, ta pai ashi.



Coronavirus wara pokteter aliba ajanga Bihar sorkari state ajung mokdanga ayutsü osang sangdongba sülen Patna nung shishilembadak nisung nongtepba noksa nung angur.

'BJP indang rong angumoka idaki: Akhilesh Yadav

Lucknow, Monupii/May 4 (Agencies): Tawa tembangba Uttar Pradesh panchayat elections nung Samajwadi Party-i takok tajung anguba dak ajemdaker party tekolakba Akhilesh Yadav-i, election result ajanga SP ya nüburtem atema tongtibangba ta jangjaogo, ta ashi. Akhilesh-isa panchayat election nung takok anguba SP candidate ajak nem tenüingsang agütsü aser parnok dang coronavirus tashidak pokteter aliba temulungdang yur takok anguba tenüing nung benjung ayongzüka mamungtsü shiogo.

"Vote agütsürtem atema Samajwadi Party ya mezüingbuba. Samajwadi Party-

i takok tulu anguba ajanga ajaki hai haura ka agizükba sayur. Party ya nüburtem tenzüksü bendanga agütsür lir. Nüburtemia onok nem vote agüja democracy kümzüka ayuba nung shilem tajung agiogo," ta Akhilesh-i ashi.

BJP sorkar aja taoba CM-i, "yimdak yimtsüingtem nung third engine sorkar ka kümteptsü atema BJP nükjidong aliba chirepogo. BJP pur, PM Modi aser chief minister indang constituency nunga tamakok nguogo. Lucknow nunga nüburtemi BJP magizük aser Samajwadi Party-i takok tajung anguogo.

(Maneni tapak 9 nung...)



New Delhi kübok Radha Soami Satsang grounds nung BLK-Max hospital-i amenokba vaccine agütsüba tesem tulutiba nung arishi küm 18 aser temapurtem vaccine agütsü atema atatepba noksa nung angur.

Mexico metro overpass ka chirep, nisung 23 asü



Mexico City nung subway indang Line 12 sazuka aluba sülen tekumzükertem iba tesem nung arua yariteptsü atatepa aliba noksa nung angur. Hombar aonung atalokba lendong nungya nisung 23 asü aser 65 yiru.

Mexico City, Monupii/May 04 (Agencies): Mexico City nung rail overpass ka sazuka lua train ka tsünglanglen aliba gari nung tsüka nisung 23 asü aser 65 yiru.

Hombar aonung iba Metro 12 line sazuka aludak lendong nung takum alirtem kumzükba maparen khen anena liasü, kechiaser train takdang aser jana tem maneni lenmang nung tsüksü akok, ta ketdangsürtemi ashi.

Tekumzükba mapa inyaksü atema crane ka iba tesemi bener arua liasü, ta Mexico City Mayor Claudia Sheinbaum-i ashi.

Sheinbaum-i ashiba agi, mozü kidangi bener aortem rongnung nisung tenet temang kanga mejungi raksar surgery agir.

"Asürtem rongnung tila-tanurtem dena lir," ta lai ashi.

Hombar aonung 10:30 ako (par mapang) meta yimti southeast tsütsü Olivos station anasa gari aika alidak iba apu

sangzuka tsüka kokozü adokba video ka Milenio TV channel nung sayua liasü.

Raksar aliba overpass nungi train takdang ana sangzua alidak emergency fire aser medical ketdangsürtemi apu amshia takdang telungi aiba noksatem nunga nguogo.

Iba lendong ataloka alidak kinunger aser tembartem Mongulbarnep adenshia liasü.

Iba Metro 12 line ya tang Mexico nung Foreign Minister inyaka alisang Marcelo Ebrard ya Mexico City indang mayor asüba mapang küm ter shi jaldang yanglua liasü.

"Tanü Metro nung lendong tulu atalokogo. Lendong ajurua alir aser kinungertem den kü sarasadem lir," ta Ebrard-i Twitter nung ashi.

"Iba lendong atalokba bushisüngdangtsü aser aibelener lira itemji merenshütsü. Nüngdakba nung yaritsü ni renema lir," ta pai ashi.

Tir Andres Manuel Lopez

Obrador indang küm trok kümük 2024 nung tembangba melen Ebrard mesüra Sheinbaum-i melentsü akok, ta aikati jembir.

Mexico City Metro ya alima nung metro tulutiba aser mazüngtiba rongnung ka lir, aser iba service ya küm 50 shi jaldang lapoker lendong tulu anaben ataloka lir.

Taoba küm March ita Tacubaya station nung train ana tsüktepa passenger ka asü aser 41 yirua liasü. 2015 küma train ka mapang shidak nung maneni Oceania station nung train ka dak tsüka nisung 12 yirua liasü.

Myanmar nung Japan nung osangbener ka aitsü

Yangon, Monupii/May 4 (Agencies): Myanmar nung taoba ita apuba Japan nung osangbener ka osang tai prokshiba atema aitsüogo, ta Yangon nung amenoker aliba Japanese embassy nungi ketdangser kati Mongolbarnü ashi.

Yuki Kitazumi, shiba April 19 nü sepaitemi par kidang nungi pur ao, pa ya military-i sorkar atsüngtokba sülen bendanger osangbenertem rongnung mezünbuba aitsüogo.

Kitazumi shiba Yangon kübok Insein tepuokdak yua liasü, pa penal code section 505A dak ajemdaker aitsüogo, koba osang taila prokshiba dak sendaka lir aser iba ozüng kübok nisung ka küm asem tashi tepuokdak ayutsü akok.

Myanmar nung ketdangsürtemi pa aitsüba osang tejangja agüja mali, ta Japanese embassy nungi

ketdangsür kati ashi.

Kasa mapang nung junta otongdaria iba ken o dak sendakba nung kecha telangzüba magütsü.

Kitazumi-i, media production company, Yangon Media Professionals achayanger aser pa Nikkei business daily osangbener ka liasü ta pa indang Facebook page aser online media den sensaksem ajanga jangjaogo.

Pa February ita-a military anema longkak aitba osang bendenba mapang apu saka mapang tatsüka lir chioktok.

Assistance Association for Political Prisoners activist group-i ashiba agi, military-i srokar atsüngtokba sülen security force temi nisung 766 tepsetogo aser Suu Kyi densema nisung 3,600 dak tema sota yua lir.

Japan sorkar aser Japan nung osangbenertem pa chioktsü khangogo.

Burkina Faso anüdoklen nisung aika tepset

Ouagadougou, Monupii/May 04 (Agencies): Burkina Faso anüdoklen sorkar anemba telungpurtemi yimtsüng ka nung ki rongdokja nisungjem jena aotsü meranger dak injang agi akhaba mapang nisung tajemba agi 30 asü.

Lendong ya Niger den arrtsü anasa Komandjari province kübok Kodyel yimtsüng nung Hombarnü atalok, ta sorkar ketdangsür Labidi Ouoba-i The Associated Press osangbener dang phone ajanga iba lendong nungi jena aoba sülen ashi.

Telungpur yagi yimtsüng ya lungbanger ki shia mi senloksü aser nisungtem tepset, ta Ouoba-i ashi.

"Ni kanga kera jena ao kechiaser kiralongrar temi teti ketdangsürtem repranger. Asen linüki yimjung arutsü asenok ajaki sarasademi," ta pai ashi.

Ano iba yimtsüng nung Hombarnü lendong nungi jena aor Mediempo Tandamba-i ashiba agi, telungpur 100 shi motorcycle aser pick-up truck tem nung arua liasü. Par tenur tanur pezü tepset.

Iba region nung shikariba nokdangtsü atema patrolling senzüba mapang mita atar amakdang Spain nung osangbener ana aser Irish nung conservationist ka tepseta Burkina sepaia ka samar hopta ka shidak lir iba

lendong ya ataloker. Taoba hopta kasa anogo linük indang Sahel region kübok Yattakou yimtsüng nung nisung 18 tepseta liasü.

Burkina Faso nung hadir tajung maliba sepaitemi al-Qaeda aser ISIL (ISIS) den sendaktepa alirtemi azüdokshiba mazüokteter, shirnoki nisung meyirijang aika tepsetogo aser ano nisung million ka dak tema tesem balala nung arishia lir.

Taoba küm sorkari mitkartem yaritsü atema sepaia telok balala dang asüngdang saka telungpur temi parnok dak meyiper amak.

Iba yimtsüng nungi mitkar nem sepaia ama raratsü teyari agütsüba mechi telungpurtemi Hombarnü civilian tem tepset, ta Armed Conflict Location and Event Data Project nung ketdangsür Heni Nsaibia-i ashi.

Telok kati iba lendong atalokba indang tenüng agia mali.

Telungpur temi Mali, Burkina Faso aser Niger nung tepetzük tia nung alir nübu shimtsü mechi aluyimer aser shiruru metsüba kin tsüngta mepetmesü adokdaksür.

Sahel region nung azüdokshi ajanga nisung million 29 teyari balala nung dang nungi million pongu agi timba lir, ta UN ajanga ashir.

Covid-19: Israel-i India dangi medical osettem yoktsü

Jerusalem, Monupii/May 4 (Agencies): Israel-i India dangi hopta tepeyong medical equipment balala yoktsü, ta Jerusalem nung ketdangsürtemi metetdaksü. Medical equipment tem rongnung oxygen generator aser respirator tem densema lir.

Item equipments tem ya Mongolbarnü nungi tenzüka hopta tepeyong tayimtsü balala nung yoktsü, ta kasa sangdong ajanga metetdaksü. India ya Israel atema tongtibangtiba tembar ka lir.

"Onok India den nokdaka lir aser talisa India nung timtem tulu ataloker aliba mapang onoki India metoktsü lir aser India nung adianutem atema taküm kümzüktsü asoshi amshiba equipmentsü tem yoktsü," ta Foreign Minister Gabi

Ashkenazi-i ashi.

"Israel o India na yimden yimsüsüba, security aser rongsenketsüng dak sendakba nung tensendaktep tajung lir. Israel atema India ya linüktem rongnung tongtibangtiba ka lir," ta Foreign Minister-i ashiba den jongkdak mapang teyari agütsüba ya linük ana tsüngda tesendaktep tajung aliba temaitsü lir, ta ashi. Paisa, item osettem anepaluba nung teyari agütsürtem ajak dang kanga pelaba lemsatepa laisü.

Osang ajanga ashiba agi Israeli Ministry of Foreign Affairs nung economic division-i teyari agütsütsü asoshi Israel-India Chamber of Commerce, Israel-Asia Chamber of Commerce, Manufacturers' Association of Israel, Federation of Israeli Chambers

of Commerce aser Israel Export Institute anisema liasü. Kasa mapang nung Amdocs-ia parnok sasep nung oxygen generators 150 tenla agütsütsü nangzükogo, koba Israel-i teyari agütsütsü aliba den septeper yoktsü.

Maneni oxygen generators aser tanga equipment tem agütsütsü atema JDC-a (American Jewish Joint Distribution Committee) densemogo. "Taoba küm wara tenzüka mapang India-i Israel nem teyari agütsütsü atema anepalutsü aser Israel nem mask, glove aser mozü yanglutsü atema raw materials tem yoktsü temelaba agütsü. Iba den Israel nung lisopurtem pei kidangi yoktsü atema anepaluba liasü," ta kasa sangdong ajanga metetdaksü.



Cali, Colombia nung saru (tax) nung temelenshi aliba anema linük tesem ajunga nung longkak aitba mapang police kati stun grenade ka longkak aiter dak mereploksütsü teka makanga lia tangokba noksa ka yangi angur. Colombia Tir Ivan Duque-i iba saru temelenshi ya Deobarnü agientsüogo.

Longleng DC-i metetdaksür

Longleng, Monupii/May 04, 2021 (TYO): SBI, Longleng nung Covid-19 positive putetba dak sendakba nung, iba wara prokba aziüoktsü aser tashidak tsüngsü bushitsü atema nungdakba meratem agia, osang tejangja ka magütsü tashi ghonda 48 atema iba ki shibangtsü, ta sangdong ka ajanga Longleng DC-i metetdaksür.

Shibangtsüba tesem nung nübur senzüsembongba nokdang aser osang tejangja ka magütsü tashi iba tesem active surveillance kübok alitsü, ta kasa sangdong nung shia lir.

'The Fortress trilogy' nung Bruce Willis denogo

New York, Monupii/May 04, 2021 (Agencies): Bruce Willis-i The Fortress trilogy nung shilem agitsü.

Cullen Bressack-i direct asütsü aliba film series nung arishi küm 66 tain Bruce-i Jesse Metcalfe aser Chad Michael Murray na den longjemtsü.

Iba film series indang mezüing installment production maparen Puerto Rico nung tenzükogo aser film sequel atonga tangoktsü sentong lir. Movie tasembuba ya taruba küm ang tangoktsü.

"The Fortress" otsü Randall

Taylor Paige-i Toxic Avenger nung shilem agitsü

New York, Monupii/May 04, 2021 (Agencies): 'Toxic Avenger' tanaben yanglushiba project nung Taylor Paige-i shilem agitsü terenemba lir.

1984 superhero flick - Toxic Avenger nung ajemdaker yanglutsü aliba film tasen nung arishi küm 30 actress Paige aniokogo.

Iba film tasen dak sendakba nung script zülutsü aser direct asütsü atema Macon Blair aniokogo. Kasa mapang, mezüing film yanglur Lloyd Kaufman aser Michael Herz naprongla Troma Entertainment atema producer ama inyaktü.

Peter Dinklage-a iba project nung aniokogo. Iba film nung pai mutant ka ama ochimashi maparen anema noktakba otsü

sayutsü.

Iba original movie ya ajaki sapuadok aser sequel asem tashi yangluogo.

Taylor-i 'Ma Rainey's Black Bottom' nung shilem tajung agiba atema telengzüba tajung nguogo. Iba film dak alia, 'White Boy Rick' nunga lai nungtugu star Matthew McConaughey aser Jonathan Majors na den külemi shilem agiogo.

'Cyrano' project nunga Peter-i cast rongnung tongti shilem agitsü terenemba lir.

Iba musical project nung 'Game of Thrones' star star Peter-i Cyrano de Bergerac ama Haley Bennett, Brian Tyree Henry, Ben Mendelsohn aser Kelvin Harrison Jr nung den külemi shilem agitsü.

Emmett aser Emile Hirsch nati yangluogo aser Alan Horsnail-i script zülutsüogo. Mezüing movie ana ya Emmett aser George Furla, Luillo Ruiz aser Chad A. Verdi nungeri yanglutsü. Kasa mapang, Tim Sullivan, Nick D'Angelo, Caesar Richbow aser Danny nunger executive producer ama inyaktü.

Bruce-i mezüing direct asütsü aliba film -'Midnight In The Switchgrass' atema Emmett den longjemtsü terenemba lir. Iba film nung Hirsch aser Megan Fox nati tongti shilem agitsü.

Iba movie ya 2004 küm atalokba ama yanglutsü, kong FBI Agent (Megan) aser Florida State officer (Emile) na longjemer nisung tepsetba ken o balala bushisüngdangtsü aser Bruce-ia direct asüba dak alaka Megan indang FBI Agent partner ama inyakba otsü ka alitsü.

Emmett/Furla banner kübok 'The Irishman' aser '2 Guns' densema Randall-i George Furla den longjemer movie 100 dak tema yangluogo, saka iba project nung pai camera maparen tsütsü achaayangtsü.

India nung '2021 Renault Triber MPV' sayaogo

New Delhi, Monupii/May 04, 2021 (Agencies): 2019 küm August ita France indang automobile company tetsüti - Renault-i parnok indang 'Triber Multipurpose Vehicle (MPV)' gari India nung sayaba mapang telangzüba tajung nguogo. Tanü tashi India shishilembadak Triber gari 75,000 tashi yokteta lir aser iba takok nung ajemdaker Renault-i 2021 model sayaogo.

2021 model nung feature tasen aika inoksema yanglutsüogo.

India nung Triber model tasenba jenjang sen lakh 5.3

(ex-showroom) aser iba ya RxE MT model alitsü. Iba model tereprangtsü taoba ama lir aser RXE, RXL, RXT aser RXZ densema model pezü nung angutsü.

Renault will be leveraging a 1.0 litre naturally aspirated engine for all the four variants

Triber 2021 variant tema nung temelenshi aika maliyongjia, iba Multi-Purpose Vehicle telung nung steering-wheel-mounted phone & audio control den külemi adjustable driver seat angutsü. Ajisüaka, Renault-i gari tereprangtsü tajungba kümtsütsü asoshi dual-tone

colour scheme den ORVMs aser LED turn indicator agi melentsüogo.

Iba model indang turbo variant ka sayatsü asoshi Triber fans aikati imlaa atadar aser iba model ya taküm küm tatemlen sayatsü imlar. Tang India nung Covid-19 tensa kanga mejungi akümba ajanga gari tasen aika sayatsü anogo atsülangtsür lir.

Iba gari alirtemi sen 17,000 talila agütsür dual colour tone option customise sütettsü akok. Company-isa Triber portfolio nung Cedar Brown ta nungja agütsüba sentsü tasen ka bendenloktsüogo.

'BJP indang rong angumoka idaki...

Samajwadi Party dak tamang akaba atema nüburtem tenüing asangtsü langa lir."

"Panchayat elections nunga BJP-i tashi mashiyimi amshi aser vote agütsüba inyakyim nung maparen inyaksa. BJP-i küm pezü yimsü asüba mapang nüburtemi parnok ashioktsü ama bilemer. SP sorkari terenlok maparen tenzüka toktsüba ajak BJP-i anendaktsüogo. Corona wara ya taoba küm nungi pokteter maneni odar, saka BJP sorkari treatment tajunga

magütsüteter aser tangalen inyakerem nema parnok taküm liyonga aotsü atema teyari magütsüteter. State tang unemployment, education aser health sectors nung inyakyim meshidakba aser shishilembaba tsütsü takoksa ajuruba agi kangshidar," ta SP tekolakbai ashi.

Paisa, BJP sorkar lenla ajak nung tamakok nguogo, ta ashi. "Panchayat elections result ajanga BJP rong angumoka aiba jangja jangja sayur. Minister, MP, MLA tem state

(Tapak 7 nungi...)

ajungai yoka BJP-i election akoktsü merang saka nüburtem parnok sang nung masu aser telangzüba tapet ka agütsüogo. BJP-i tesempatep prokshiba aser lokti lemdangtsütsü tasa asaba West Bengal elections nung magizük. Uttar Pradesh panchayat elections result ajanga osang agütsüba ya 2022 küm Assembly elections indang osang asütsü. Uttar Pradesh nung BJP yimsütsüba tembangtsübasu," ta Akhilesh Yadav-i ashi.

MULUNGNEN O



WT. TOSHIKALA IMCHEN (LONGJANG)
Aso : 09.06.1953
Asu : 29.04.2021

Meimlaba mapang ka nung ajungbena onoki miema aliba asür **WT. TOSHIKALA IMCHEN** asüba anogo nung kinungertem shisabulu aser mangyimjashi nung alidang kija, kibong aser lokdi balalai nübu, rongsen den sarasadem agi nungita yaritepogo nenok ajak den pelaba lemsateper.

Kija, kibong, yimten aser Arogo balala tangi tsüngdong arua pelar ta meshitetaka asen teyanglusang Tsüngremi nenok mapa tajung meyiba agütsütsü ta ozü sarasadem.

Temeim kinungbo aser kinungertem.

Mulungnen O



(25.01.1984 - 27.04.2021)

Ozüi teti meima aliba asür **Imliyanger** (Changtongya Yimsen) mapang tatsüka shiranger pa alima nungi piladang shirnokisa onok mangyima jashi lemsatepa sarasadem, nübu, rongsen aser ariabilem tesünep o agi onok mulung süngzükja yariogo, nenok ajak dang tebang agi meshitetba tepela tulu lemsateper. Nenok temeim mapa onoki teti bilemtettsü.


~ Temeim Tsürabur & Kinungertem.

ODILA MENUNGRAR

Teti dang akümtsüba aser meima aliba odila **Aotemsü** Yimjenkimong, akümüli lima nungi pilar tanü küm ka ajungba anogo kinungertemi na bilemteter.

Nü sempet tajung onoki kodanga mamatsü. Kodak nung ajurutsü onok sarasadem.

Temeim kinungertem.



Rev. Dr. K Imo Aier tepela küm 90 ajungba anogo



Ajemalur aser Tsüngrem tanela akar nem Tsüngremi arishi talang moatsür aser ibaji nai tanü küm 90 tashi tonggetta litetogo. Iba temoatsü küm nung Onok pelateper aser ano maneni Onok akümdong süa alitsü arishi talang moajangni ta asen Tsüngrem tang kanga sarasademer.

Küm 90 ajongba tepela salem tulu agütsür.

Nü temeim kinungtsü aser chinurtem.



ALIBA BAPTIST CHURCH


P.O. Mokokchung- 798601 B.P.O. Sabangya
Nagaland: India

Tepela Lemsateper

Aor rongnung takotet Tsüngrem wadang nung walunir Rev. L. Kari Longchar (Chungtia) pa dak alang Senate of Serampore Collage (University) ajanga Honorary Doctor of Divinity konang agütsüba asoshi Aliba Baptist Arogo ajanga tepela aser tenüngsang agütsür. Tsüngremer wadang tuluba inyaktüsü arishi moajang ta sarasademtsür.

Sd/-
Pastor, ABA

Sd/-
Secretary, ABA



Kolkata kubok hotel kima Rajasthan Royals team pur senzusenbongba bus anena ayuba noksa nung angur. India nung Covid-19 tensa mejungi kuma aoba asadanteta, Mongolbarnü Indian Premier League Governing Council aser BCCI na rongdak senden ka mener sülen, IPL 2021 season thinena atatsü telemtetba agiogo.

Mutua Madrid Open: Barty quarter-i iogo

Madrid, Monupii/May 04, 2021 (Agencies): Mutua Madrid Open asayamung tetsür kija Round of 16 asaya nung, World no. 1 Ashleigh Barty-i 2020 French Open takok angula Poland tsür Iga Swiatek tsükdaktsüba sülen, quarter-final-i iogo.

2020 kum Swiatek-i mezüing Roland Garros title makokdang 2019 kum Barty-i iba asayamung koka lir. Taruba ita asayatsü aliba French Open asayamung nung asayar anapronglai shilem agitsü, saka Madrid Open nung Barty-i 7-5, 6-4 agi Swiatek akokba ajanga la jenjang tajungba akümer.

"Taonung ni bilemba ama jangratema asayaogo, iba amala tetoktepba asaya nung shilem agitsü jangrar," ta Barty-i ashi.

"Iga asaya yimya balaka lir. Lai iba amala tasa amshia asayaba ngua pelar. La ya tetokteper tajung ka asünung ni asaya yimyattem tendanga asayatsüsa aküm," ta lai ashi.

Semi final asaya tongtettsü atema Australia tsür Barty-i Madrid Open asemben tashi takok angula Petra Kvitova den quarter final asayatsü. Kasa round of 16 asaya tanga ka nung Kvitova-i Russia tsür Veronika Kudermetova madak 6-3, 4-6, 6-4 agi takok nguogo.

Red clay court nung Swiatek-i tukuben tashi takok ngua asaya arur sülen, Barty-i la tsükdaktsüogo. Kasa mapang iba court nung Barty-i asaya 14 tashi takok angur alitsü.

Kvitova, shibai 2011, 2015 aser 2018 kum iba asayamung koka lir, lai Kudermetova den kanga toktepa asaya liasü. Taoba ita Charleston asayamung final nung Kudermetova-i la indang mezüing WTA title koka lir.

Madrid title pezübuba takok angutsü nukjidong yur shilem agila Kvitova-i tasa balala amshia aser iba den külemi serve tajung yoka Kudermetova den asayaogo.

"Atangji nunga iba asaya tasak liasü. Serve aiben asütsüsa aküm aser set shia nung break point ka tasüsa angutsü kanga timtema liasü. Ajisüaka, ni kü sasa azüoka asayatetba atema pelar. Kudermetova-i tashi ajak agüja asaya liasü. Lai Charleston asayamung koker iba asayamung nung shilem agir asünung, lai kanga junga asayaogo. Tarutsü nung la asayar tajung ka akümtsü imlaa atar," ta asaya temer sülen Kvitova-i ashi.

"Iba asaya tenzüker nungi tatem tashi ayong ayonga asayatsü maongka mangu, saka kü sasa azüokteta asayaogo. Ibaji ajanga ni iba asaya koktettsü maongka angu," ta Kvitova-i shisem.

Seed tibuba Belinda Bencic-a Round of 16 koka quarter final tongtetogo. Iba asaya nung Belinda 7-6 (7/2) 4-3 agi Ons Jabeur tejakdang aliba mapang. Ons tetsüing yiruba ajanga la asaya nungi tukadok.

Taküm T20 World Cup UAE nung asayatsü

New Delhi, Monupii/May 04, 2021 (Agencies): Taküm kum indang T20 World Cup asayamung ya India nung UAE-i belentsü. November ita Covid-19 - "third wave" agi kongshitsü ama asadanteta aser iba mapang shilem agir team kati danga India-i arutsü memulungtsü asünung, BCCI-i iba asayamung ya renemba ama linük nung masü saka UAE nungang asayatsü asoshi asalentong yangludat.

Iba asayamung tenzüktsü ita ka lia BCCI-i telemtetba ka agütsütsü, saka tang asaya aliba IPL franchise indang bio-bubble kar nung COVID-19 putetba ajanga iba asayamung thitsütsüsa akümba sülen, October-November tsüingda team 16 tashi shilem agitsü aliba World Cup asayamung India nung ayongtsü asoshi Indian cricket board tebilemstü adoker.

Tawa BCCI ketdangsürtemi centre sorkar nung tekolakpur kar den sensaksemogo aser iba World Cup UAE nung ayonga asayatsü asoshi telemtetba ka magiteti lir. Iba marquee tetoktepba, koba tesem tuku nung asayatsü asalentong yanglua liasü, item tesem ano mejangjateti lir.

"Hopta pezü tsüingda IPL asayamung thitsüba ya alima

tesem balala nungi team aruagi shilem agitsü asoshi tekümzüktsü maliba kuli sayur. Tesüiba kum 70 nung tang India nung wara tesashi ka den raraba mapang bendanglen nungi team aruagi asayatsü ya tamakoktsü," ta senior BCCI ketdangsür kati ashi.

"Taküm November ita India nung Covid-19-third wave agi kongshitsü akok. Ajiasünung, BCCI-i iba asayamung UAE-i belentsü asoshi sentong yanglutsü," ta pai shisem.

Health takotet temi, taküm September ita India nung iba wara tasemben adoktsü ta tekümdangtsü agütsür. Iba dak sendakba nung Maharashtra health minister Rajesh Tope-i lemsatepogo.

Tesüiba anogo ishika tejakdang nungi India nung nisung lakh 3 dak tema Covid-19 tasen putetdar aser iba osang angazüka board züingsem aser ICC aoksar. Iba tensa asadanga international cricket team tem Covid-19 wara lendongbang nungi kumzuka yutsütsüba dak alaka tanga lenmang mali."Tensa süngjema mekümra, taruba ita trok tsüingda bendanglen nungi tongtibang team aikati India-i arutsü memulungtsü.

"Ibayongji, BCCI-i iba

asayamung UAE-i belentsü asoshi mulungtsü imlar," ta otongdar sangdong ka ajanga metetdakttsü.

June ita ICC senden amentsü, kong T20 World Cup asayamung dak sendakba nung telemtetba ka agitsü, saka IPL asayamung thitsüba sülen, India nung iba asayamung ayonga asayatsü lenmang kangarabo sadema madoktsü ama asadanteter.

BFI Executive Director RK Sacheti alima nungi pilaogo

New Delhi, Monupii/May 04, 2021 (Agencies): Mongolbarnü, Indian Olympic sports administration nung ajaki meteta aliba aser Boxing Federation of India (BFI) indang Executive Director, Raj Kumar Sacheti süogo.

Sacheti ya 'cardiac arrest' (temulungjang agi mapa meinyaki akümba) timtem agi matongdang pa Covid-19 tashidak puteta mozüki ka nung anepalua liasü. Sacheti ya Alwar, Rajasthan nungi lir aser pa arishi kum 55 liasü. Chartered Accountant ka ama inyaka alisang Sacheti-i Indian boxing tsütsü temelenshi tulu adokdakttsütsü asoshi tongti shilem agiogo.

India nung Sacheti ya saisapong wadang

IPL 2021 asayamung thinena atar

Mumbai, Monupii/May 04, 2021 (Agencies): Tang India tesem balala nung asaya aliba Indian Premier League (IPL) 2021 season indang bio-bubble kar nung Covid-19 putetba osang angazükba sülen, iba asayamung thinena atatsüsa kumogo.

Indian Premier League Governing Council (IPL GC) aser Board of Control for Cricket in India (BCCI) na rongdak senden ka agiba sülen, IPL 2021 season thinena atatsü lemteba liasü.

Mongolbarnü IPL franchise bio-bubble ana tashi nung COVID-19 wara agi kongshiba sülen, iba asayamung thitsütsü ishika tejakdang SRH nung asayar Wriddhiman Saha dak Covid-19 putetba sülen, Sunrisers Hyderabad franchise nung adener ajunga quarantine asütsüla ta meteta aküm.

Iba timtem ajanga tang asaya aliba IPL asayamung nung shilem agir franchise yagi tanungba asaya nung shilem agitsü asoshi lenmang sadema madoker.

Mongolbar, Delhi nung SRH-i Mumbai Indians na asayatsü renemer liasü. Ajisüaka, Saha dak Covid-19 positive putetba ajanga iba match masayatetsüsa akümer.

ANI den jembiba mapang, BCCI vice president Rajeev Shukla-i, tan season atema IPL asayamung athir.

TOI sangdong ka ajanga angazükba agi, franchise kati BCCI dang, iba asayamung ita asem, ita pungo, ita trok sülen ang ayonga asayatetsü akok. Ajisüaka, tangba tensa asadanga, iba asayamung anena atatsü nungdaker," ta mepishio.

IPL Broadcasters Star India, shirnoki iba asayamung alima dang sayutsü asoshi shilem tuluka agidar, parnokkia tang atema iba asayamung thinena

atatsü asoshi mulunga lir.

Hombar aonung, Kolkata Knight Riders aser Chennai Super Kings nungi asayatem aser ketdangsür densema Delhi aser Chennai nung ground staff dak Covid-19 putetba sülen, IPL asayamung ya Kolkata aser Bangalore nungi Mumbai belentsü asoshi BCCI mazüingi jembishinüa liasü.

"IPL 2020 edition takok ngua asayatsü asoshi BCCI-i asalentong tajung yangluogo. Taoba asayamung den medemdanga, 2021 edition atema lenla aisü nung junga achaayang masüba aniteter. Tesem balala nung IPL ayonga asayatsü lemteba, tayimtsü ajanga senzusenbongtsü tasa, global health protocol agi melaba ama mapang tatakzük atema hotel staff quarantine' masüba, asaya tesem nungi meta talanglang pilar hotel balala mekaa ayuba, GPS tracking system junga mapa meinyakba aser Covid-medical staff peria maliba ajanga iba timtem ajangshir.

Tang ajungbena, BCCI-i IPL asayamung ya bendangleni belener motettsü, kechiyong UAE nung India nungi aruba tayimtsü nokdang lir. Tsüingluruwa mongpu mesüi tashi India nung iba asayamung ayongzüktsü ya tamakoktsü asütsü. Ajisüaka, India indang England tour sülen bilateral cricket aser ICC T20 World Cup asayamung asayatsü renemer lir asünung, mapang tongi BCCI-i asalentong yanglutsü teimla lir.

Tang atema, IPL asayamung anena atatsü aser linük tesem ajunga nung tang atalokba tensa asadanga BCCI-ia lenmang tajungtiba bushitsü akok.

Mongolbarnü, Indian Premier League indang official broadcaster - Star India-ia BCCI telemtetba nung hai aura katopogo.

BILEMDANGANG

"Tajung nendaka bushiri maongka bushir."